

[Augsburg], 18. Juli 1553

An Johannes Oporinus

UB Basel, Fr. Gr. I 11, fol. 176r.

Steinmann Nr. 672.

Druck: Steinmann, Briefwechsel S. 139 (Auszug).

Lit.: Steinmann S. 64 (mit Auszug).

S. P. D. Ante paucos dies Scheubelio literas ad te dedi, et exemplum epistolae meae ad Vascosanum datae, misi, vna cum castigationibus 25 foliorum Isocratis: quae te iam accepisse spero. quod autem tu totis duobus mensibus nihil ad me dedisti, factum esse reor vel penuria tabellariorum, vel, quod vno fasce reliqua Isocratis ad me perferri omnia voluisti. In quo rectè facere te iudico. Demosthenis autem institutum et iam absolutum a me opus, vt tibi cordi sit, quamprimum intelligere cupio. Nam velle te id imprimere, sed: quando autem, et quomodo, ignoro. Ego si res tuae paterentur, quamprimum id fieri vellem, et ita fieri, vt Demosthenes integer haberetur. Erit autem integer, mea quidem opinione, si primum cum Aeschine et Dinarcho aduersarijs, deinde, si graecus cum latino, Tertio et postremò si cum Vlpiani commentarijs coniunctus fuerit. Sin aliter feceris, proximus quisque palmam hanc tibi praeripiet. Etsi autem non ignoro, esse qui Vlpianum aspernentur, homines praecipi et arroganti iudicio: doctos item molestè ferre graecae linguae cum latina coniunctionem: tamen studiosis nihil fore vtilius existimo, vt proximè copiosius ad te scripsi. Hoc enim certò statuere debes, nos in Isocrate et Demosthene, non magnatibus, qui ocium legendi sibi esse negant, non doctis, qui et graecos autores habent, et conuersiones contemnunt, laborare, sed ludimagistris semidoctis et scholasticis vtriusque linguae studiosis et nondum satis peritis. Hac de re coràm tecum colloquetur, D. Ioannes Henricus Munzingerus Mecaenatis nostri medicus, ciuis tuus, et summa familiaritate mihi coniunctus. Per eum igitur, aut citius si poteris, certiore de tua sententia me reddas velim. Correxi graecos codices, conuersiones meas saepius et quam accuratissimè relegi. Spero non tantum veniam, sed laudis etiam aliquid apud candidè doctos. stupidos obtrectatores et maleulos calumniatores non curo. Verùm vtut res ceciderit, non in animo habeo quicquam deinceps mutare in meis lucubrationibus. Itaque iam arena cedo omnibus ijs qui se solos in Helicone natos et educatos esse opinantur. Illud tamen vnum mihi ademptum esse uolo, si vita suppetet atque tempora patientur, vt commentarios absoluam quos olim inchoauui, nunc situ squallere patior: vt et errores si qui forte admissi fuerint, corrigam, et in ijs etiam ea notem, quae vel magis propriè vel elegantius dici posse videantur. Vale. et cura vt quamprimum tuam sententiam intelligam. Est enim in animo, quamuis infirma valetudine, antequam ad Nondinas abeatis, vos adire, nisi meas lucubrationes vobis non probari intellexero. Iterum vale. 15 Cal[endas] Augusti Anno 1553.

Hiero[nymus] Wolfius
Tuus.